

大清會典

禮部



凡釋奠

傳心殿之禮。爲殿於

禁城內。

文華殿之東。每歲春秋仲月。

皇帝御經筵。先期一日。遣官祇告

傳心殿。

皇師伏羲氏。

神農氏。

軒轅氏。

帝師陶唐氏。



有虞氏。

王師夏王禹。

商王湯。

周文王。

武王均正位南嚮。

先聖周公東位西嚮。

先師孔子西位東嚮。

皇師。

帝師。

王師位各一案。每案帛一。劔一。籩二。豆二。爵三。鑪一。

鐙二。尊共一。篚共一。

先聖。

先師位各一案。每案帛一。劔一。籩二。爵三。尊一。篚一。

鑪一。鐙二。帛爵均預行安設。恭遇。

皇帝親詣行禮。日出前三刻。太常卿赴。

乾清門。奏請行禮。

皇帝御袞服乘輿出宮。前引後扈如常儀。

皇帝入。

文華門降輿。贊引。太常卿二人自殿垣西門恭導。

由京行門入。

傳心殿中門就拜位前北嚮立典儀贊執事官各
共廼職贊引官奏就位

皇帝詣拜位司香各奉香盤進贊引官恭導
皇帝詣

皇師伏羲氏位前司香跪進香贊引官奏上香

皇帝立奉枉香次三上辨香以次詣各
神位前上香畢復位贊引官奏跪拜興

皇帝行二跪六拜禮司祝至祝案前跪三叩奉祝版
跪案左贊引官奏跪

皇帝跪贊讀祝司祝讀祝畢詣

皇師位前跪安於案三叩退

皇帝行二跪六拜禮典儀贊奉祝帛詣燎所有司奉
祝次帛次香恭送燎所

皇帝轉立拜位旁西嚮候祝帛過復位祝帛燎畢奏
禮成恭導

皇帝出景行門至

文華門陞輿還宮○遣官祇告由殿垣東門入循
景行門東夾道詣

傳心殿階下正中行禮祝帛送燎所避立西旁東
向餘如儀○

皇太子春秋會講。祇告於

傳心殿。太常卿引由殿垣西門入。循景行門左扉

入殿行禮。設拜位於

皇帝拜位之後。餘儀與

經筵

親祭禮同。○每月朔望。太常寺堂上官一人詣

傳心殿陳酒果。上香行禮。



